

DOMENIE IV «VIE PAL AN»

Antifone di jentrade Sal 105,47

Salvinus, Signôr nestri Diu,
e tirinus dongje di framieç dai popui,
par che al to non sant o podìn dâi laude
e cu la tô laude ricreâsi.

Colete

Signôr nestri Diu,
danus di adorâti cun dut il cûr,
e di volêur ben a ducj i umign cul amôr che al covente.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Sof 2,3; 3,12-13

O lassarai framieç di te un popul puar e sclet.

Dal libri dal profete Sofonie
Cirîf il Signôr,
ducj vualtris int sclete de tiere,
che o metês in vore i siei comandaments.
Cirîf la justizie,
cirîf la scletece.
Salacor o cjatarês un ripâr
te zornade de rabie dal Signôr.
O lassarai framieç di te
un popul puar e sclet,
che al cirarà ripâr tal non dal Signôr:
il rest di Israel.
No fasaran plui tristeriis
e no disaran plui falsetâts,
no si cjatarà plui su la lôr bocje
une lenghe bauserie.
A passonaran e a polsaran
cence che nissun no ur fasi malegraciis.
Peraule di Diu.

SALM RESPONSORIÂL dal Salm 145

R. Furtunâts i puars tal spirt.
Il Signôr al manten la sô fedeltât par simpri.
Ur fâs justizie ai tibiâts,
ur dà il pan a di chei che a son afamâts.
Il Signôr i presonîrs al libere. R.

I vôi dai vuarps il Signôr al torne a vierzi,
il Signôr al torne a tirâ sù chei che a son par tiere,
il Signôr i vûl ben a la int juste,
il Signôr al vuarde la int foreste. R.

Al viôt dal vuarfin e de vedue,
impen che lis trainis dai triscj lis savolte.

Il Signôr al regnarà par simpri:
il to Diu, Sion, di ete in ete. **R.**

SECONDE LETURE 1 Cor 1,26-31

Diu al à sielzude chê che pal mont e je debolece.

De prime letare di san Pauli apuestul ai Corints

Dait une cjalade a la vuestre clamade, fradis: no son tancj framieç di vualtris i sapients seont la cjar, no son tancj i potents, no son tancj i grancj. Ma Diu al à sielzude chê che e je matetât dal mont par mortificâ i sapients, Diu al à sielzude chê che e je debolece dal mont par mortificâ i fuarts, Diu al à sielzût ce che tal mont nol à nissun valôr e ce che al è sbeleât e ce che nol è nuie par disfâ lis robis che a son, di mût che nissun nol puedi vantâsi denant di Diu. Al è propit par lui che vualtris o sês in Crist Jesù, che al è diventât par nô, midiant di Diu, sapience, justizie, santificazion e redenzion, par che, come che al è scrit: “Chel che si vante, che si vanti tal Signôr”.

Peraule di Diu.

CJANT AL VANZELI Mt 5,12

R. Aleluia, aleluia.

Stait contents e gjoldêt,

parcè che grande e je la vuestre ricompense tai cîi.

R. Aleluia.

VANZELI Mt 5,1-12

Furtunâts i pùars tal spirt.

Dal vanzeli seont Matieu

In chê volte: viodint lis folis, Jesù al lè su la mont e, a pene sentât, i lerin dongje i siei dissepui.

Alore al vierzè la bocje par inscuelâju disint:

«Furtunâts i puars tal spirt,

parcè che il ream dai cîi al è lôr.

Furtunâts chei che a vain,

parcè che a saran consolâts.

Furtunâts chei che a son bogns di cûr,

parcè che a ereditaran la tiere.

Furtunâts chei che a àn fan e sêt de justizie,

parcè che a saran saciâts.

Furtunâts chei che a àn misericordie,

parcè che a cjataran misericordie.

Furtunâts i monts di cûr,

parcè che a viodaran Diu.

Furtunâts chei che a lavorin pe pâs,

parcè che ur disaran fîs di Diu.

Furtunâts chei che a son perseguitâts par colpe de justizie,

parcè che il ream dai cîi al è lôr.

Furtunâts vualtris cuant che us svilanmaran e us perseguitaran e, cu la falsetât, a disaran cuintri di vualtris ogni sorte di mâl par colpe mê. Stait contents e gjoldêt, parcè che grande e je la vuestre ricompense tai cîi».

Peraule dal Signôr.

Su lis ufiertis

O metin sui tiei altârs, Signôr,

i regâi de nestre suditançe;

acetiju di bon voli

e fasiju diventâ il sacrament de nestre redenzie.
Par Crist nestri Signôr.

Antifone a la comunion Sal 30,17-18

Fâs lusî la tô muse sul to famei,
salvimi pal to boncûr.
Signôr, che no vedi di restâ deludût
cun tant che ti ài clamât.

O ben: Mt 5,3.5

Furtunâts i puars tal spirt,
parcè che il ream dai cîi al è lôr.
Furtunâts chei che a son bogns di cûr,
parcè che a ereditaran la tiere.

Daspò de comunion

Rinfuarfîts cul sacrament de nestre redenzie, ti preìn, Signôr,
che chest jutori de salvece eterne
nus fasi cressi inte vere fede.
Par Crist nestri Signôr.